

Na osnovu člana 3. i 7. Zakona o komunalnoj djelatnosti ("Službeni list SR BiH", broj 20/90) i člana 55. tačka 2. Statuta općine Zavidovići ("Službeni glasnik općine Zavidovići", broj 3/2002-prečišćeni tekst), Općinsko vijeće Zavidovići na 54. sjednici od 15.04.2004.godine, donijelo je

ODLUKU

o komunalnom redu

I – OPĆE ODREDBE

Član 1.

Odlukom o komunalnom redu (u daljem tekstu Odluka) regulišu se prava, dužnosti i obaveze preduzeća kome su povjereni poslovi održavanja i čišćenja javnih gradskih površina, drugih preduzeća, ustanova, samostalnih privrednika, MZ, udruženja građana i građana u vezi sa održavanjem komunalne higijene, zelenila i komunalnih objekata i uređaja i propisuje način i uslove održavanja komunalnog reda na području općine Zavidovići.

Član 2.

Pod održavanjem javne higijene podrazumijeva se čišćenje javnih saobraćajnih površina u naselju koje obuhvata prikupljanje, odvoženje, deponovanje i uništavanje otpadaka i padavina sa saobraćajnih površina; održavanje i uređivanje javnih zelenih površina kao što su: parkovi, travnjaci, zelenilo uz saobraćajnice i zelene površine uz stambene zgrade, obale rijeka i vodotoka, održavanje javnih saobraćajnih površina u naselju koje obuhvata popravke i modernizaciju ulica, pločnika, trgova, objekata za javnu rasvjetu, vertikalne i horizontalne signalizacije i javne rasvjete u naselju.

Član 3.

Pod javnim površinama u opštoj upotrebi u smislu ove odluke podrazumjevaju se:

- javne saobraćajne površine: ulice, ceste, trgovi, javni prolazi, javna stepeništa, mostovi, skverovi, javna parkirališta, pločnici kao i ostale površine javnog saobraćaja,
- javne zelene površine: parkovi, drvodredi, posude sa ukrasnim biljem, živice i žive ograde, travnjaci, obale rijeka i vodotoka, dječija igrališta, zelene površine uz cestu u naselju, uz stambene, stambeno-poslovne i javne objekte, šumski pojas, i ostale slične površine.,
- uređene rekreacione površine, sportska igrališta, te ostali javni sportski objekti i uređaji na njima, kao i prostori povezani sa tim terenima i oko njih,
- željeznički peroni, stajališta javnog autobusnog saobraćaja, benzinske pumpne stanice prostor oko njih
- otvoreni pijačni i tržni prostor oko prodajnih objekata, gradske česme, i
- neuređene javne površine

Član 4.

Komunalnim objektima i uređajima u smislu odredaba ove Odluke, smatraju se oni objekti i uređaji koji svojom funkcijom služe za zadovoljavanje nužnih potreba građana, preduzeća, ustanova, samostalnih privrednika kao što su: stočna pijaca, pijaca rabljene robe i poljoprivredna, javna zelenila, parkovi, travnjaci, cvijetne aleje, ulice, ulična rasvjeta, dvorišta stambenih i poslovnih zgrada, vodovodi, kanalizacije, kupališta i javni nužnici ili koji svojim postojanjem utiču na uljepšavanje grada ili na njegov izgled kao što su: spomenici kulture, groblja, reklame, natpisi, plakati, oglasi i obavještenja, saobraćajni znaci, ograde i sl.

Za objekte koji zbog dotrajalosti pojedinih vanjskih dijelova na zgradi predstavljaju opasnost po život i zdravlje ljudi i okolinu, nadležni inspektor izdat će rješenje da se bez vremenskog odlaganja izvrši popravka ili izmjena navedenih dijelova.

Prije poduzimanja radova na održavanju i uređenju fasada i drugih vanjskih elemenata lica iz predhodnog člana ove Odluke dužna su pribaviti odgovarajuće odobrenje za izvođenje radova.

U postupku izdavanja odobrenja za izvođenje radova na objektu koji predstavlja spomenik kulture, obavezno se pribavlja i mišljenje organa nadležnog za poslove zaštite kulturno-historijskog nasljeđa.

II – KOMUNALNA HIGIJENA U GRADU

Član 5.

Održavanje komunalne higijene u gradu vrši preduzeće kojemu su ti poslovi povjereni, a na osnovu Programa koji sadrži oblik i kvalitet održavanja i obnavljanja pojedinih komunalnih objekata i uređaja i komunalnih usluga zajedničke komunalne potrošnje, visinu potrebnih sredstava za realizaciju programa i raspored sredstava za svaku djelatnost posebno i po namjenama, kao i mjere za sprovođenje Programa.

Vlasnici i korisnici stanova, poslovnih i drugih prostorija i objekata, dužni su održavati čistoću u dvorištima, vrtovima, krugovima preduzeća i drugim prostorima u vlastitoj upotrebi.

Član 6.

Održavanje komunalne higijene u gradu omeđeno je granicom urbanog područja grada Zavidovići (K.O. Zavidovići – grad).

1. Održavanje javne čistoće

Član 7.

Pod održavanjem zelenih javnih i rekreacionih površina smatra se:

1. Čišćenje smeća, kamena, korova, lišća, košenje trave i odvoz, odstranjivanje papira, suhih grana, suhog cvijeća i grmova, sječa suhih i oštećenih stabala, potkresavanje stabala, sađenje hortikulturnog bilja, sjetve trave, okopavanje i blagovremena rezidba hortikulturnog bilja, zalijevanje travnjaka, cvjetnjaka i nasada, održavanje klupa, staza, korpi za otpadke i zamjena oštećenih kao i vršenje drugih agrotehničkih mjera potrebnih za rast, razvoj i estetski izgled u parkovim, drvoredima, travnjacima, cvjetnjacima, nasadima i skverovima,
2. održavanje zelenih površina koja se nalaze na zemljištu čiji su vlasnici ili korisnici preduzeća, odnosno druga pravna lica i građani, vršit će se kao pod tačkom 1. ovog člana,
3. čišćenje papira i svih drugih otpadaka sa zelenih površina posebne namjene (groblja, spomen obilježja i sl.) i održavanje hortikulturnog bilja i zasada na istim vršiće se kao pod tačkom 1. ovog člana.
4. čišćenje papira, smeća, svih vrsta kabastih otpadaka, košenje trave, uklanjanje suhih grana i stabala, pranje asfaltnih staza i igrališta na izletištima i rekreacionim površinama.

Član 8.

Pod održavanjem zelenih javnih i rekreacionih površina podrazumjeva se posebno:

1. obnova uništenog i dotrajalog biljnog materijala,
2. orezivanje i oblikovanje stabala i grmlja,
3. okopavanje biljaka,
4. košenje trave,
5. đubrenje i prihranjivanje biljaka,
6. uklanjanje otpalog granja,
7. održavanje posuda sa ukrasnim biljem,
8. održavanje pješačkih staza i druge opreme na javnim zelenim površinama u ispravnom stanju,
9. obnavljanje i rekonstrukcija javne zelene površine,
10. skidanje snijega sa grana,
11. održavanje dječijih igrališta na javnim zelenim površinama,
12. zalijevanje biljaka u sušnom periodu i
13. ostale radnje neophodne da bi zelene javne površine služile svrsi.

Član 9.

Preduzeće odnosno pravno i fizičko lice koje upravlja javnim sportskim, rekreacionim i sličnim objektima, parkovima, šumama i sličnim površinama, obavezno je održavati javnu zelenu površinu unutar tih prostora te brinuti se za njenu obnovu i zaštitu.

Član 10.

Preduzeće odnosno pravno ili fizičko lice kome je povjereno vršenje poslova održavanja javnih zelenih površina, obavezno je redovno popunjavati drvorede, uklanjati suhe i bolesne grane kao i biljne štetočine na javnim zelenim površinama.

Član 11.

Na javnim zelenim površinama zabranjeno je uzgajanje voćaka i povrtnih biljaka i bilo kakvo njihovo obrađivanje u poljoprivredne svrhe, osim u vanrednim situacijama po odobrenju Službe za upravu ekonomskih poslova i poduzetništva.

Član 12.

Radi zaštite javnih zelenih površina zabranjeno je:

1. Rezanje i skidanje grana vrhova sa ukrasnog bilja i drveća,
2. guljenje kore stabala, zasijecanje, zabadanje noževa, zabijanje eksera i vijaka, stavljanje plakata na drveće i sl.
3. penjanje po drveću,
4. neovlašteno branje cvijeća i vađenje biljaka,
5. uništavanje travnjaka, iskopavanje i iznošenje zemlje,
6. napasanje životinja na javnim zelenim površinama,
7. ispuštanje otpadnih voda, kiselina, ulja, i fekalija na javne zelene površine,
8. vožnja biciklom, motociklom, automobiliom ili teretnim motornim vozilom,
9. parkiranje vozila na javnoj zelenoj površini,
10. pranje, čišćenje i popravljavanje automobila na javnoj zelenoj površini,
11. loženje vatre i potpaljivanje stabala,
12. istovar i skladištenje raznog materijala, ogrjevnog drveta, uglja i slično
13. hvatanje i uznemiravanje ptica kao i skidanje i oštećivanje gnijezda,
14. upotreba u druge namjene površina namjenjenih za dječiju igru i korištenje sprava za igru od strane odraslih osoba kao i njihova upotreba suprotno namjeni,
15. ležanje i spavanje na parkovskim klupama, sjedenje na naslonima klupa i svako drugo nenamjensko korištenje i oštećivanje opreme.
16. igranje fudbala, košarke, i drugih igara.

- 152 -

Član 13.

Zabranjeno je kretanje vozila parkovima i drugim zelenim površinama, parkiranje motornih vozila i kampiranje u cilju odmora i prenoćišta.

Lice koje svojim radnjama naruši izgled javne površine dužno je istu dovesti u prvobitno stanje.

Član 14.

Na javnim površinama je zabranjeno opravljavanje i pranje vozila i obavljanje zanatskih djelatnosti, rastezanje betonskog željeza, loženje vatre, klanje i pečenje i izvođenje bilo kakvih drugih radova, kojima se prljaju te površine i ometa saobraćaj na njima ili narušava njihova osnovna namjena.

Član 15

Na urbanom području grada Zavidovići ne mogu se organizovati cirkusne priredbe, igre sa životinjama i druge slične zabave.

Izuzetno od odredbe iz predhodnog stava Općinski načelnik kada ocijeni svrsishodnost održavanja takve zabave, može odobriti izdavanje odobrenja za organizovanje zabave, pod uslovima koje on odredi.

Član 16.

Sječa i uklanjanje stabala naložit će se nadležnom komunalnom preduzeću koje održava javne površine u sljedećim slučajevima:

- ako je stablo potpuno prestalo sa vegetacijom,
- ako postoji opasnost od pada stabla,
- ako stablo svojim postojanjem i rastom ugrožava stabilnost stambenih ili poslovnih objekata,
- u slučaju kad se stablo nalazi na lokalitetu novo projektovanog objekta za koje je izdato odobrenje za građenje

Član 17.

Stabla na javnim površinama u blizini stambenih objekata moraju se održavati tako da ne smetaju stanovanju.

Grane stabla ne smiju smetati javnoj rasvjeti i bezbjednosti saobraćaja i vazдушnim vodovima (električnim, PTT i sl.), u protivnom se moraju ukloniti.

Redovno uklanjanje stabala i grana iz predhodnog stava vrši nadležno komunalno preduzeće.

Stabla koja smetaju i ugrožavaju bezbjednost ljudi i objekata, uklonit će vlasnik u roku od 7 dana od dana kada je konstatovana opasnost.

Član 18.

Služba za upravu ekonomskih poslova i poduzetništva, odsjek za inspekcije može rješenjem naložiti vlasniku ili korisniku dvorišta da o svom trošku poruši stablo koje svojim postojanjem ugrožava bezbjednost građana i imovine.

Član 19.

Prekopavanje javnih zelenih površina, kao i ostalih javnih površina, radi postavljanja, uklanjanja, izmjene i održavanja podzemnih instalacija i uređaja, može se vršiti uz odobrenje Službe za upravu geodetskih, imovinsko pravnih poslova i urbanizma.

Uz zahtjev za izdavanje odobrenja za prekopavanje, podnosilac zahtjeva je dužan priložiti skicu mjesta na kome će se izvoditi radovi sa naznačenjem dužine, širine i dubine kanala koji će se kopati.

U slučaju iznenadnih i očiglednih kvarova na podzemnim instalacijama, organizacija koja upravlja instalacijama može izvršiti prekopavanje i otklanjanje kvara bez odobrenja iz stava 1. ovog člana i odmah dovesti prekop u prvobitno stanje.

Član 20.

Odobrenjem za prekop, pored radova koji se trebaju izvoditi, određuje se slijedeće:

- vrijeme u kojem se radovi trebaju obavljati,
- rok završetka radova,
- rok u kome se mora ukloniti preostali materijal,
- rok u kome se treba ulica dovesti u prvobitno stanje.

Član 21.

Ukoliko se kolovoz prekopava po širini, prekopavanje se vrši po etapama, tako da jedna strana kolovoza uvijek bude osposobljena za odvijanje saobraćaja.

Ukoliko se radi o radovima koji su takve prirode da se saobraćaj mora obustaviti, investitor je dužan da uz saglasnost organa nadležnog za bezbjednost saobraćaja, zatvori ulicu, mjesto izvođenje radova označi propisnom siganlizacijom i radove obavi u najkraćem roku.

Ukoliko se vrši prekopavanje trotoara po širini, izvođač radova je dužan da osigura bezbjedan prelaz pješaka preko iskopa.

2. Čišćenje javnih površina

Član 22.

Izvođači građevinskih radova dužni su preduzet i sve potrebne mjere za održavanje čistoće na gradilištima i na javnim površinama oko gradilišta, a naročito:

1. izgraditi prilazne puteve od čvrstog materijala sa gradilišta do asfaltiranih površina, tako da se sa gradilišta ne iznosi blato i druga prljavština,
2. snositi troškove čišćenja uličnih površina ispred radilišta i to sve dotle dokle dopire rasturani materijal, odnosno dokle su zaprljane javne površine,
3. pročititi vodne jarkove i rešetke uličnih slivnika u blizini gradilišta radi slobodnog oticanja vode,
4. prilikom izvođenja radova iznad ulica staviti zaštitne skele i uređaje koji sprečavaju prljanje javnih površina i obezbjeđuju zaštitu prolaznika,
5. obezbjediti transport građevinskih mašina na način kojim se ne šteti kolovoz, javne i zelene površine.

Član 23.

Prevoznici materijala koji se lako rasipa (šljunak, kamen, pijesak, smeće, piljevina, zemlja, šljaka i tečnost) dužni su svoje vozilo podesiti tako da se materijal koji prevoze ne rasipa po javnim površinama, a točkove vozila prije izlaska na javne površine očistiti od blata i drugih prljavština.

Vozila kojima se vrše prevozi iz stava 1. ovog člana nesmiju se pretovarati na ulicama i drugim javnim površinama.

- 154 -

Član 24

U postupku izdavanja urbanističke saglasnosti za izgradnju objekta u gradu pribavit će se saglasnost i preduzeća koje održava i čisti javne gradske površine, da su obezbijeđeni uslovi održavanja čistoće, javnih i zelenih površina oko gradilišta i na ulicama za vrijeme gradnje.

Član 25

Putnička i teretna vozila mogu se kretati i okretati samo na kolovozima i drugim saobraćajnicama, a skretanje na obrađene i neobrađene površine nije dozvoljeno.

Zabranjeno je kretanje, zaustavljanje i parkiranje vozilima na trotoarima.

Vozači koji postupe suprotno predhodnim stavovima dužni su snositi troškove vanrednog čišćenja zaprljanih površina, odnosno naknaditi štetu učinjenu na površinama koje nisu određene za saobraćaj vozila.

Član 26

Na javne površine zabranjeno je bacanje papira i drugih otpadaka, izlivanje otpadnih materija (vode, fekalije), kao i vršenje drugih radova koji stvaraju nečistoću i zauzimanje javnih površina za smještaj robe, ambalaže, ogrevnog drveta i drugih stvari, osim kada za to postoje posebni razlozi i potrebe privremenog zauzimanja javnih površina.

Odobrenje za privremeno zauzimanje javnih površina izdaje općinski organ uprave nadležan za komunalne poslove.

Član 27.

Građani, preduzeća, samostalni privrednici koji izvode radove na ulicama i drugim javnim površinama, dužni su obezbjeđiti da se zemlja i građevinski materijal ne raznose po površinama van mjesta, a odmah po završetku radova izvršiti čišćenje i pranje površine koja je zaprljana.

Član 28.

U slučaju da građani, preduzeće, samostalni privrednici ne izvrši čišćenje i pranje zaprljane površine ili ne otkloni druge smetnje koje utiču na normalnu upotrebu javne površine, taj posao obaviti će preduzeće kome je povjereno održavanje i čišćenje javnih površina, na teret građana, preduzeća ili samostalnog privrednika na osnovu posebnog naloga nadležne inspekcije.

Preduzeće koje održava javne površine izvršiti će radove iz predhodnog stava ako građani, preduzeće ili samostalni privrednik ne izvrši svoju obavezu u roku kojeg odredi nadležna inspekcija.

Član 29.

Čišćenje ulica i trotoara vrši se, u pravilu, u vrijeme kada je najmanji saobraćaj vozila i pješaka, osim u slučajevima kada je to potrebno radi uklanjanja posljedica elementarnih nepogoda.

Čišćenje pijačnih prostora, kao i ulaza u sportske objekte, bioskope i slično vrši se odmah po završetku rada u tim objektima.

Član 30.

Ulični prodavači srećaka, čestitki i sl. dužni su obezbjeđiti odgovarajuće posude za prikupljanje otpadaka od artikala koje prodaju, a odmah po završetku posla očistiti i po potrebi oprati javne površine koje su zaprljane.

Član 31.

Javne površine, koje su date na upravljanje i korištenje pojedinim preduzećima, ustanovama, samostalnim privrednicima i drugim fizičkim licima za obavljanje njihove djelatnosti čiste i održavaju korisnici u vlastitoj režiji.

Preduzeća, ustanove, samostalni privrednici i druga fizička lica dužni su održavati čistom i druge površine ako se prljaju vršenjem njihove djelatnosti.

Član 32.

Čišćenje javnih površina iz člana 6. ove Odluke vrši se prema utvrđenoj dinamici u skladu sa intezitetom prljanja pojedinih površina.

Dinamiku čišćenja površina i objekata u opštoj upotrebi utvrđuje preduzeće kome su ti poslovi povjereni, a za ostale površine i objekte njihovi vlasnici odnosno korisnici.

Član 33.

Asvaltirane i druge javne površine moraju se prati u skladu sa intezitetom njihovog prljanja.

Pranje ulica i drugih javnih površina vrši se po pravilu noću u vremenu od 23 do 5 sati. Izvan ovog vremena smije se vršiti pranje samo po dozvoli komunalne inspekcije i u slučajevima kada vremenske prilike ne dozvoljavaju rad noću ili kada za to postoje drugi opravdani razlozi.

3. Uklanjanje snijega i leda

Član 34.

Snijeg i led uklanjaju se sa javnih saobraćajnih površina kao i sa krovova zgrada uz javne saobraćajne površine.

Snijeg sa javnih površina počinje se uklanjati kad dostigne visinu od 5 cm, a ako pada neprekidno mora se uklanjati više puta.

Led sa javnih površina uklanja se odmah po njegovom nastanku.

Snijeg i led sa krovova zgrada uklanjaju se kad postoji mogućnost da se odrone i ugroze bezbjednost prolaznika i zgrade.

Član 35.

Uklanjanje snijega i leda sa javnih saobraćajnih površina određuje se Planom zimskog održavanja lokalnih cesta na prijedlog Službe za upravu ekonomskih poslova i poduzetništva.

Nadležno preduzeće dužno je redovno obavještavati Službu za upravu ekonomskih poslova i poduzetništva i organ nadležan za bezbjednost saobraćaja o stanju javnih, saobraćajnih površina, te o mjerama preduzetim za izvršenjem plana zimske službe za vrijeme dok postoje nepogodni vremenski uslovi.

Član 36.

Za uklanjanje snijega i leda sa javnih saobraćajnih površina (ulica i cesta) odgovorno je nadležno preduzeće .

Za uklanjanje snijega i leda sa staza, stepeništa i puteva na javnim površinama odgovorno je nadležno preduzeće.

Za uklanjanje snijega i leda sa krovova poslovnih zgrada odgovorno je preduzeće ili druga pravna i fizička lica koja su korisnici poslovnih prostora u tim zgradama.

Za uklanjanje snijega i leda sa krovova stambenih zgrada odgovorni su vlasnici ili korisnici stanova u njima.

Za uklanjanje snijega i leda sa trotoara, parkirališta, tržnica, sportskih objekata autobusnih stajališta i sličnih prostora odgovorno je pravno lice koje upravlja tim površinama ili se njima koristi, odnosno pravno ili fizičko lice kojima je povjereno održavanje ovih površina.

Za uklanjanje snijega i leda sa trotoara uz zgrade odgovorni su vlasnici zgrade odnosno vlasnici ili korisnici stanova i poslovnih prostora u zgradi. Izuzetno, za uklanjanje snijega i leda sa trotoara ispred uličnih lokala odgovorni su vlasnici i korisnici lokala.

Za uklanjanje snijega i leda sa pločnika uz kioske i pokretne uređaje, odgovorni su vlasnici odnosno korisnici kioska i pokretnih uređaja.

Za uklanjanje snijega i leda sa taksi stajališta, odgovorno je Udruženje taksista.

Član 37.

Javne saobraćajne površine mogu se, radi sprečavanja nastanka leda posipati odgovarajućim materijalom.

Kolovozi ispod i pored kojih je izgrađena javna kanalizacija, odnosno koji su izgrađeni od asfalta, betona ili kocki ne smiju se posipati materijalom granulacije veće od 8 mm. Javne saobraćajne površine uz drvorede ne smiju se posipati solju i drugim hemijskim sredstvima.

Član 38.

Zabranjeno je:

1. iznošenje i gomilanje snijega iz dvorišta, bašta i drugih slobodnih površina na ulice i trotoare,
2. Bacanje snijega ispred zgrada na saobraćajnice,
3. Deponovanje snijega i leda u parkove i zelene površine,
4. Zatvaranje snijegom i ledom slivnika i šahtova,
5. Sanjkanje i klizanje na javnim saobraćajnim površinama i na zaleđenim vodenim površinama.

Član 39

Pri uklanjanju snijega i leda ne smiju se oštećivati površine sa kojih se vrši uklanjanje. Lice koje ošteti površine, objekte i nasade na površinama dužno je da ih dovede u prvobitno stanje.

4. Prikupljanje, deponovanje i odvoz smeća

Član 40

Smeće u smislu ove Odluke smatraju se sve otpadne materije koje nastaju kao posljedica uobičajnog korištenja površina i objekata u opštoj upotrebi, stambenih, poslovnih i drugih objekata i pripadajućeg zemljišta koje ne služi za poljoprivredne namjene.

Član 41

Smećem na javnim površinama i objektima u opštoj upotrebi smatraju se sve otpadne materije koje se stvaraju kao posljedice zbivanja i ponašanja na tim površinama i objektima i prirodnih procesa koji nastaju usljed klimatskih okolnosti.

Član 42

Kućnim smećem smatraju se sve otpadne materije koje se stvaraju u stanovima i poslovnim prostorijama preduzeća, ustanova, samostalnih privrednika i građana koje se po svojoj veličini i obimu mogu odlagati u propisane posude za privremeno deponovanje smeća (kontejneri i korpe).

Krupnim otpadom u smislu ove odluke smatraju se čvrsti otpadci koji nastaju u stanovima ,zajedničkim prostorijama a koji se po svojoj veličini ,količini i postanku ne smatraju kućnim smećem iz stava 1 ovog člana ,a naročito kućni aparati,pokućstvo sanitarni uređaji,kartonska ambalaža,u većim količinama i dimenzijama ,olupine vozila ,te njihovi dijelovi. Deponovanje smeća iz predhodnog stava vrši se na prostoru koji je privremeno za to određen.

Krupni otpad se iznosi iz stanova ,zajedničkih prostorija i poslovnih objekata nedjeljom ,a preduzeće koje održava i čisti javne površine obavezno je krupni otpad odvesti na gradsko smetlište narednog dana (ponedjeljak)

Član 43

Industrijskim otpacima smatraju se otpaci koji nastaju u procesu proizvodnje i prerade.

Član 44

Glomaznim otpacima smatraju se predmeti i materijali kao što su: razni otpaci zanatske i kućne radnosti, šljaka, otpaci građevinskog materijala, dotrajala motorna vozila i njihovi dijelovi, te otpaci organskog porijekla iz poljoprivredne proizvodnje, trgovine, ugostiteljstva i sl.

Član 45

Specifičnim otpadnim materijalima smatraju se otpaci koji nastaju u zdravstvenim, veterinarskim i sličnim radnim organizacijama.

Član 46.

Prikupljanje, odvoženje, deponovanje i uništavanje smeća, industrijskih otpadaka, glomaznih otpadaka obavlja preduzeće kojemu su ti poslovi povjereni.

Privremeno deponovanje smeća iz predhodnog stava vrši se u specijalne zatvorene posude većeg kapaciteta (kontenjere i sl.) koji se lociraju na mjestima gdje ne ometaju saobraćaj vozila i pješaka i ne umanjuju estetski izgled okoline.

Član 47.

Prikupljanje i privremeno deponovanje kućnog smeća vrše građani i preduzeća, ustanove, samostalni privrednici u za to specijalne zatvorene i tipizirane posude, odnosno u druge odgovarajuće posude.

Član 48.

Posude za kućno smeće drže se na mjestima koja su za to izgrađena ili predviđena investiciono-tehničkom dokumentacijom za izgradnju objekta.

Lokaciju kontejnera za kućno smeće za objekte kod kojih to pitanje nije riješeno na način iz predhodnog stava, određuje preduzeće koje čisti javne površine uz saglasnost komunalne inspekcije.

Kontenjere za kućno smeće moraju se locirati i držati na mjestima koja su pristupačna i malo uočljiva i da svojim postojanjem i položajem ne umanjuju estetski izgled okoline i ne ometaju normalno korišćenje ostalih objekata.

Zaduženo preduzeće za čišćenje javnih površina je obavezno da posude za smeće (korpe, kontenjere) redovno čisti, pere i povremeno (najmanje jednom mjesečno) vrši tekuću dezinfekciju.

Član 49.

Urbanistička saglasnost za izgradnju novih objekata ili rekonstrukciju, dogradnju postojećih objekata u Zavidovićima sadrži i uslove izgradnje uređaja za prikupljanje i privremeno deponovanje smeća, koji se utvrđuju uz saglasnost preduzeća koje čisti javne površine.

Neće se izdati odobrenje za građenje ukoliko investiciono-tehničkom dokumentacijom nije predviđena izgradnja prostora iz predhodnog člana, odnosno neće se izdati upotrebna dozvola ukoliko pomenuti prostori nisu izgrađeni.

Nadležni inspekcijski organi dužni su prilikom utvrđivanja uslova za otvaranje i početak rada novih poslovnih prostorija utvrditi dali su obezbijeđeni svi potrebni uslovi za sakupljanje otpadaka. U slučaju da takvi uslovi nisu ispunjeni neće se dozvoliti početak rada.

Član 50.

U kontenjer za kućno smeće, kao i u posude za prikupljanje smeća sa javnih površina zabranjeno je bacanje industrijskih glomaznih otpadaka i tečnosti, nagrizajućih, otrovnih, eksplozivnih i zapaljivih materijala, uginulih životinja i predmeta od metala izuzev konzervi i sl.

Predmeti i materije iz predhodnog stava deponuju se i uništavaju na posebnim mjestima i po posebnom postupku uz saglasnost nadležne inspekcije.

Član 51.

Zabranjeno je prekopavanje, prebiranje i rasipanje smeća iz posuda za privremeno deponovanje smeća i na javnim smetljištima.

Zabranjeno je paljenje smeća u posudama ili na javnim površinama koje nemaju karakter poljoprivrednog zemljišta. Na javnim površinama građani su dužni otpatke stavljati u za to određene posude.

Član 52.

Kontenjere za privremeno deponovanje smeća za novoizgrađene stanove i poslovni prostor nabavlja investitor i predaje ih na upravljanje preduzeću .

Za etažne zgrade i stanove locirane na javnim površinama koji nemaju posude za privremeno deponovanje smeća ili nemaju odgovarajućih posuda, nabavku posuda vrši preduzeće koje je zaduženo za čišćenje javnih površina. Za individualne stambene zgrade i poslovne prostorije nabavku posuda vrši vlasnik zgrade odnosno poslovne prostorije.

Zamjena posuda za privremeno deponovanje smeća pada na teret preduzeća zaduženog za čišćenje javnih površina.

Nabavka priručnih posuda za prikupljanje otpadaka na javno-saobraćajnim površinama i parkovima pada na teret preduzeća iz predhodnog stava.

Član 53.

Obavezno je odvoziti smeće sa javnih površina i kućno smeće najmanje tri puta sedmično, a po potrebi i češće, ili po zahtjevu nadležne inspekcije.

Odvoz smeća iz predhodnog stava vrši zaduženo preduzeće specijalnim sabirnim vozilima.

Izuzetno, iz djelova grada i iz preduzeća, ustanova gdje je pristup sabirnim vozilima nemoguć, smeće se može odvoziti i drugim vozilima podešenim za taj posao, tako da se spriječi rasipanje tereta.

Član 54.

Pri iznošenju kućnog smeća i otpadaka mora se naročito voditi računa da se u zgradi i pred zgradom smeće i otpaci ne rasipaju, ne podiže prašina, ne širi smrad i ne stvara lupa, kao i da se ne prljaju i ne oštećuju prostorije i površine u kojima se nalaze sudovi za smeće i otpadke ili koroz koje se smeće i otpaci iznose.

Poslije iznošenja otpadaka prostor oko posuda i ulični prostor mora se očistiti. Radnici koji utovaraju smeće u vozila dužni su posude iznositi i vraćati ih natrag na njihovo stalno mjesto i za sobom zatvarati vrata ako postoje.

- 159 -

Član 55.

Odvoz kućnog smeća obavezan je za sve vlasnike i korisnike stambenog i poslovnog prostora lociranog na području iz člana 6. ove Odluke, a zaduženo preduzeće za čišćenje javnih površina je obavezno i odgovorno za blagovremeno i kvalitetno vršenje odvoza smeća.

Član 56.

Odvoz industrijskih i glomaznih otpadaka iz člana 44. ove Odluke vrši se na mjesto i po uslovima koje odredi organ uprave nadležan za komunalne poslove.

Ukoliko se deponovanje otpadaka iz predhodnog stava vrši na smetljištu kojim upravlja ovlašteno preduzeće deponovanje se može vršiti samo pod uslovima i na način koji odredi isto preduzeće.

Odvoz svih otpadaka izuzev industrijskih vrši preduzeće zaduženo za čišćenje javnih površina.

Član 57.

Trajno deponovanje smeća iz domaćinstva, preduzeća, poslovnih prostorija, ustanova, javnih površina, vrši se na javnim smetljištima u skladu sa urbanističkim, sanitarno-higijenskim i drugim propisima.

Organizovanje, upravljanje i održavanje javnih smetljišta u nadležnosti je preduzeća koje čisti javne površine.

Na javnim smetljištima zabranjen je pristup i boravak neovlaštenih lica.

Član 58.

Način korištenja i uređivanja javnih smetljišta kontroliše općinski organ uprave nadležan za komunalne poslove i nadležna inspekcija.

Ovi organi su naročito dužni:

1. da određuju površinu i druge fizičke osobine javnih smetljišta,
2. da određuju mjesta na javnim smetljištima gdje se može deponovati određena vrsta smeća,
3. da paze na upotrebu objekata i površina u okolini javnih smetljišta,
4. da se staraju o održavanju rokova za uništavanje zaraznih klica pomoću specijalnih sredstava (dezinfekcija) i za sistemsko uništavanje štakora, miševa i poljskih štetočina (deratizacija) javnih smetljišta kao i o upotrebi materijala za ove poslove,
5. da naredbe zatvaranje javnih smetljišta ako zajednički nađu da javno smetljište iz zdravstvenih i drugih razloga više ne može koristiti i da odrede novu lokaciju, i
6. da vrše druge poslove koji su u vezi sa režimom rada na javnom smetljištu.

Član 59.

Infektivni i potencijalno kontaminirani materijali, biološki konfiskati i slični materijali koji nastaju u zdravstvenim i veterinarskim organizacijama i klaonicama ne mogu se deponovati na javnim smetljištima.

Uništavanje materija iz predhodnog stava vrše preduzeća i ustanove kod kojih nastaju ti otpaci spaljivanjem ili na drugi način koji zadovoljava zahtjevima zaštite čovjekove okoline.

- 160 -

Član 60.

Lica koja rade na čišćenju javnih površina i odvoza smeća i drugih otpadnih materija moraju imati odgovarajuću zaštitnu odjeću i obuću uobičajenu u komunalnim djelatnostima.

Vozila preduzeća koja rade na održavanju komunalne higijene, moraju biti obilježena odgovarajućim oznakama koje su uobičajene ili propisane za komunalnu oblast.

Član 61.

Fekalije i druge otpadne vode po pravilu se ispuštaju u javnu kanalizaciju. Ako u ulici ili naselju nema kanalizacije, fekalije i druge otpadne vode moraju se ispuštati u septičke jame koje se grade u skladu sa urbanističko-tehničkim uslovima datim u urbanističkoj saglasnosti.

Zabranjeno je ispuštanje fekalija na zemljišta koja se koriste u poljoprivredne i druge svrhe.

Član 62.

Čišćenje septičkih jama i odvoz fekalija vrši se samo noću u vremenu od 22 do 5 sati. Odvoz fekalija vrši se u posebnim kolima-cisternama.

Čišćenje septičkih jama i odvoz fekalija može se vršiti u drugo vrijeme ako preduzeće koje obavlja te poslove ima specijalnu opremu za te poslove.

Član 63.

Čišćenje septičkih jama vrši se po dogovoru korisnika usluga i preduzeća koje upravlja gradskim vodovodom i kanalizacijom.

Imalac septičke jame dužan je da prijavi čišćenje iste preduzeću ili drugom licu osposobljenom za pražnjenje septičkih jama kad se jama napuni do dvije trećine od ukupne svoje zapremine.

Član 64.

Leševi životinja moraju se u najkraćem roku odstraniti sa javnih i drugih površina.

Odvoz i zakopavanje leševa životinja iz grada vrši preduzeće kojemu su povjereni poslovi čišćenja javnih površina na način utvrđen ovom Odlukom.

Član 65.

Leševi životinja uginulih ili ubijenih zbog zaraze moraju se za to na određenom mjestu spaliti, a prostorije i predmeti koji su bili izloženi zagađenju moraju se dezinficirati.

Član 66.

Zakopavanje leševa životinja obavezno se vrši u jamu dubine određene posebnim propisima, uz predhodnu dezinfekciju leša, a poslije zatrpavanja vrši se dezinfekcija površine jame.

Član 67.

Korisnici ili vlasnici uginulih životinja u gradskom naselju kao i drugi građani koji zapaze leš životinja na javnim mjestima, dužni su da to odmah prijave preduzeću zaduženom za čišćenje javnih površina.

- 161 -

Član 68

Uništavanje i uklanjanje pasa lotalica u naseljenim mjestima vrši preduzeće kojemu se ti poslovi povjere i sa kojim Općinski načelnik zaključi ugovor.

Poslovi iz predhodnog stava mogu se povjeriti i specijalizovanim organizacijama ili pojedincima koji raspolažu odgovarajućom opremom za obavljanje poslova uklanjanja i uništavanja pasa lotalica

5. Držanje životinja

Član 69.

Na javnim gradskim površinama i na ostalim površinama na urbanom dijelu grada u zonama od I do IV-te zone, bezuslovno je zabranjeno držanje stoke, pasa i peradi.

Bezuslovno je zabranjeno držanja stoke, pasa i peradi u dvorištima objekata u kojima se vrše javni poslovi ili okuplja veći broj građana, a naročito zdravstvenih ustanova, škola, vjerskih objekata i drugih objekata od opšteg interesa, kao i u podrumskim i poslovnim prostorijama.

Držanje životinja-kućnih ljubimaca u stambenim i poslovnim zgradama i prostorijama dozvoljeno je pod uslovom da se ne remeti javni red i mir ostalih građana i korisnika poslovnog prostora i ako to nije protivno higijensko-sanitarnim propisima.

Šetanje kućnih ljubimaca pasa na javnim gradskim površinama može se vršiti samo pod uslovom da je pas na povodcu i da nosi brnjicu na glavi.

Član 70.

Vlasnici životinja-kućnih ljubimaca dužni su prijaviti držanje kućnog ljubimca Službi za upravu ekonomskih poslova i poduzetništva, na osnovu čega će se voditi evidencija o kućnim ljubimcima na području grada

Evidencija o kućnim ljubimcima sadrži: podatke o vlasniku, vrsti i rasi kućnog ljubimca, starosna dob i datume zdravstvenih pregleda i vakcinacije-imunizacije.

Za držanje kućnih ljubimaca pasa, plaća se godišnja naknada u iznosu od 120.00 KM po jednom kućnom ljubimcu.

Član 71.

Na površinama na kojima nije bezuslovno zabranjeno držanje stoke, pasa i peradi dozvoljeno je držati stoku, pse i perad pod slijedećim uslovima:

1. da postoji ograđeno dvorište odvojeno od ulice i drugih zgrada,
2. da za smještaj stoke, pasa i peradi postoji posebno izgrađena prostorija udaljena od stambenih zgrada puta i vodnog objekta najmanje 20 metara,
3. da je prostorija u kojoj je smještena stoka priključena kanalom na septičku jamu,
4. štale i svinjci moraju imati jame za đubrišta izgrađene od betona, kamena ili cigle fugovane u cementnom malteru,
5. da se redovno vrši čišćenje i pranje gospodarskih objekata, a povremeno i dezinfekcija, dezinfekcija i deratizacija,
6. dokaz o veterinarskom pregledu,
7. da su sa načinom držanja životinja, načinom i mjestom deponovanja stajnjaka i stočne hrane saglasni vlasnici i korisnici stambenih objekata koji se nalaze u blizini objekata za smještaj stoke, pasa i peradi.

Član 72.

Staje i stajska đubrišta moraju biti izgrađena od tvrdog građevinskog materijala i fugovana. Uz đubrište mora se izgraditi i nepropusna đubrišna jama (osočara) na udaljenosti od puta i vodnih objekata najmanje 20 metara, što se utvrđuje urbanističko-tehničkim uslovima.

- 162 -

Član 73

Držanje pčela i postavljanje pčelinjaka na javnim i drugim površinama dozvoljeno je pod slijedećim uslovima :

-Košnice sa pčelama moraju biti udaljene najmanje sedam metara od granice sa parcelom drugog vlasnika inajmanje 20 metara od nastanjenog stambenog objekta. Izuzetno košnice sa pčelama se mogu postaviti i na manju daljinu od sedam metara ,ali ne manju od četiri metra ako se vlasnici parcela-posjeda dogovore o tome uz obaveznu izgradnju prepreke-zida u visini od dva metra ispred leta pčela.

-Košnice sa pčelama ne mogu biti bliže saobraćajnici-putu od 10 metara,a od igrališta i sportskih terena najmanje 15 metara.

-Udaljenost pčelinjaka od drugog pčelinjaka je najmanje 100 metara ,ukoliko se vlasnici pčelinjaka drugačije ne dogovore.

III – JAVNO ZELENILO

Član 74.

Javnim zelenilom u smislu odredaba ove Odluke smatraju se javne površine zasađene drvećem, cvijećem, travom i drugim zasadima, koje služe za odmor, rekreaciju ili za uljepšavanje izgleda grada ili pojedinih objekata.

Član 75.

Javne površine namijenjene za uređenje zelenila određuju se urbanističkim rješenjem a promjene namjena tih površina mogu se odobriti samo u skladu sa urbanističkim rješenjem ili ovom Odlukom.

O promjeni namjene iz predhodnog stava odlučuje Općinsko vijeće na prijedlog organa nadležnog za poslove urbanizma.

Član 76.

Odobrenja za izgradnju stambenih, poslovnih i drugih objekata ne može se izdati investitoru ako nema izgrađen i odobren projekat za uređenje zelenila oko objekta.

1. Parkovi

Član 77.

Parkovi se izgrađuju na mjestima određenim urbanističkim rješenjem i zasađuju se određenom vrstom biljaka koje odgovaraju funkcionalnom i estetskom izgledu kraja ili glavnih objekata. Urbanistička rješenja o vrsti bilja obavezna su, a može se dati odobrenje za njihovu izmjenu samo uz pribavljenu saglasnost organa nadležnog za poslove urbanizma.

Član 78.

Uređenje parkova vrši se po opštim pravilima arhitekture, građevinarstva i hortikulture.

Član 79.

Pri projektovanju parka, projektant je dužan da, pored urbanističkih zahtjeva, u projekat unese i sve što je potrebno da bi park mogao da se koristi, prema svojoj namjeni.

U parkovima moraju biti izgrađene glavne staze za šetnju, pristupne staze, sredstva za odvodnjavanje, plato za okupljanje većeg broja ljudi i osvijetljenje, a mogu biti izgrađeni i drugi objekti koji doprinose ljepšem izgledu parka.

- 163 -

Član 80.

U parkovima i na ostalim javnim površinama postavljaju se klupe, stolice, korpe, kantice za otpatke, uređaji za igru djece i slični objekti, kao i izgrađene fontane (česme), vodokoci i spomenici. U parkovima se mogu izlagati i razna djela umjetničke, istorijske i slične vrijednosti.

Lokacije za postavljanje korpi za otpatke određuje nadležni organ za poslove urbanizma. Nabavku i zamjenu, postavljanje, održavanje i čišćenje korpi za otpatke vrši preduzeće koje je zaduženo za čišćenje javnih površina.

Član 81.

Korisnici parkova dužni su se pridržavati režima upotrebe parkova i poštovati natpise i obavještenja kojima se u parkovima objavljuju određena upozorenja.

Samo na platoima ili na za to određenim mjestima u javnom zelenilu može se okupljati organizovana grupa ljudi u cilju organizovanja društvenih aktivnosti (proslave dječijih praznika i druge prigodne svečanosti).

Odobrenje za bilo kakvo namjensko korištenje parka i za bilo kakvo postavljanje stalnih ili privremenih objekata u cilju izložbe, reklame ili prodaje bilo kakvih proizvoda izdaje nadležni općinski organ.

2. Drvoredi

Član 82.

Drvoredi se uređuju na trotoarima, skverovima i drugim javnim površinama.

Član 83.

Drvoredi moraju biti postavljeni na način koji odgovara mjestu, a nesmije biti postavljen ispred ulaza u dvorište, garaže ili druge objekte u koje se ulazi vozilima, na raskrscicama gdje bi ugrozilo bezbjednost saobraćaja kao i na trotoarima ukoliko ugrožava bezbjednost saobraćaja.

Član 84.

Drvo iz drvoreda se može ukloniti samo iz određenih razloga i to: zbog starosti, truhlosti, zbog izdizanja trotoara ili temelja drugih objekata, zbog ugrožavanja sigurnosti drugih dijelova objekata, zbog sigurnosti saobraćaja, radi postavljanja električnih, vodovodnih, kanalizacionih, telefonsko telegrafskih i drugih uređaja i instalacija.

Dozvolu za uklanjanje drveća iz drvoreda izdaje općinski organ uprave nadležan za poslove komunalne inspekcije.

Član 85.

Odredbes ove Odluke o parkovima shodno će se primjenjivati i na drvorede.

3. Travnjaci i cvijetne aleje

Član 86.

Na određenim javnim površinama može se uređivati zelenilo pod uslovima propisanim ovom Odlukom.

Građani, preduzeće, ustanove, samostalni privrednici oko čijih objekata se nalaze dvorišta ili slobodni prostori, dužni su sa ulične strane objekta izvršiti odgovarajuća hortikulturalna uređenja tih prostora, održavati ih i obnavljati u cilju poboljšanja estetskog izgleda grada uz pribavljenu saglasnost o vrsti zasada.

- 164 -

Član 87.

Trava, cvijeće i ostalo nisko bilje može se saditi na skverovima ukoliko nisu isti predviđeni za kretanje pješaka, na trotoarima ukoliko su širi od šest metara, po sredini kolovoza ako se kolovoz izgrađuje sa jednosmjernim trakama i oko spomenika, ukoliko to ne ugrožava saobraćaj ili te površine ne služe za kretanje pješaka.

Član 88.

Uređenje travnjaka i cvijetnih aleja vrši se prema posebno izrađenim projektima i pravilima hortikulture, a izbor biljaka se vrši u skladu sa klimatskim uslovima i okolnim ambijentima.

Član 89.

JKP "Radnik" ili drugi subjekt kojem je povjereno održavanje i uređenje zelenila odobriće uklanjanje dijela travnjaka ili cvijetne aleje samo ako je to potrebno radi izgradnje drugih objekata prema urbanističkom rješenju.

Član 90.

Odredbе ove Odluke koje govore o parkovima shodno će se primjenjivati na travnjake, skverove i cvijetne aleje.

4. Zaštita javnog zelenila

Član 91.

Investitori objekata dužni su neposredno ili preko izvođača radova zaštititi zelenilo od uništavanja do koga bi došlo prilikom izgradnje tih objekata.

Ako se zelenilo nikakvim sredstvima ne može zaštititi investitor može u zelene površine unositi razni materijal ili prolaziti preko njih ali je dužan po završetku objekta urediti ili obnoviti zelenilo onako kako je ono bilo prije otpočinjanja izgradnje.

Član 92.

U obavljanju svoje poslovne djelatnosti i drugih poslova preduzeća, ustanove, samostalni privrednici i građani dužni su čuvati zelenilo od oštećenja.

Preduzeće zaduženo za održavanje javnih gradskih površina će da naplati štetu pričinjenu javnom zelenilu od građana, preduzeća, ustanova, samostalnih privrednika i iz tih sredstava izvršiti obnavljanje oštećenog sadnog materijala.

**IV – IZGRADNJA, REKONSTRUKCIJA I ODRŽAVANJE
KOMUNALNIH OBJEKATA**

1. Komunalni objekti u gradu

Član 93.

O izgradnji, rekonstrukciji, održavanju i korištenju javnih površina i drugih komunalnih objekata stara se preduzeće zaduženo za održavanje javnih površina, ukoliko ovom Odlukom ili drugim propisima nije drugačije određeno.

Javne površine ili objekti izgrađeni ili uređeni za određenu namjenu povjeravaju se na održavanje, upravljanje i korištenje JKP "Radnik" i drugim preduzećima. Odnos između JKP "Radnik" i preduzeća utvrđuje se ugovorom.

JKP "Radnik" i drugo preduzeće iz predhodnog stava ne može promijeniti režim upotrebe javne površine ili objekata.

Naknade koje se u vidu takse naplaćuju od korisnika javnih površina i drugih javnih komunalnih objekata, koriste se za njihovo održavanje i unapređenje.

Član 94.

Ulice, trgovi, skverovi, nadzemne i podzemne instalacije i drugi objekti grade se po propisima iz oblasti građevinarstva ako ovom odlukom ili urbanističkim rješenjem nije drugačije određeno.

Član 95.

Svaka novoizgrađena ili rekonstruisana ulica mora predhodno biti opremljena podzemnim instalacijama ili uređajima.

U ulicama koje nisu snadbijene instalacijama i drugim podzemnim uređajima izgradnja svih podzemnih instalacija i uređaja vrši se istovremeno kako bi se izbjeglo pojedinačno i naizmjenično raskopavanje uređenih površina.

Član 96.

Javnu rasvjetu čine: rasvjetna tijela postavljena na ulicama i trgovima, autobuskim i željezničkim stanicama, oko spomen objekata, sportskih objekata, objekata kulturno-historijske vrijednosti, vjerskih objekata, oko mostova, stepeništa i slično.

Javna rasvjeta po pravilu mora svijetliti noću. Vrijeme uključivanja i isključivanja javne rasvjete mora se uskladiti sa godišnjim dobom i atmosferskim prilikama.

O održavanju javne rasvjete brine se preduzeće kome su povjereni ti poslovi.

Stubovi i druga postrojenja za svjetiljke postavljaju se prema urbanističkim rješenjima.

Posude sa dekorativnim zelenilom postavljaju se u ulicama čiji su trotoari širi od šest metara, na kolovozima ako se time ne ugrožava saobraćaj i ako se time ne postiže skretanje vozila na pravac kretanja, kao i na drugim mjestima ako se time poboljšava estetski izgled grada.

Član 97.

Oko stambenih zgrada u gradu ne mogu se podizati ograde, izuzev ograde za čije postavljanje da odobrenje organ nadležan za poslove građevinarstva.

Postojeće ograde koje su podignute prije stupanja na snagu ove Odluke, imaju se usaglasiti sa urbanističkim zahtjevima.

Ograde čije se postojanje ne može usaglasiti sa urbanističkim zahtjevima poružit će se.

Općinski organ nadležan za poslove urbanizma u odobrenju mora obavezno naznačiti do koje visine se može dozvoliti podizanje ograde i kakvi su njeni osnovni estetski elementi.

Odobrenje za podizanje ili izradu ograde izdaje organ nadležan za poslove građevinarstva.

Član 98.

Industrijski i drugi objekti čija namjena zahtijeva ograđivanje, mogu podizati ogradu prema posebnoj projektnoj dokumentaciji koja mora biti usaglašena sa urbanističkim rješenjem.

Član 99.

Telefonske govornice, gradski časovnici, parking časovnici i slični uređaji izgrađuju se prema odgovarajućim standardima, normativima i propisima, a u skladu sa urbanističkim rješenjem.

- 166 -

Član 100.

Stanične zgrade na autobusnoj i željezničkoj stanici, otvorene čekaonice, kamionski terminali, sanitarni uređaji i prostori ispred stanice te čekaonice putničkog i teretnog, željezničkog, autobusnog i drugog saobraćaja moraju biti stalno održavane u ispravnom stanju.

Klupe i ostali predmeti kao i nasadi koji se nalaze na peronima i ispred staničnih zgrada i otvorenih čekaonica moraju biti čisti, uredni i ispravni, a dotrajale i oštećene predmete i nasade, vlasnici odnosno korisnici moraju odmah ukloniti i zamjeniti novim.

Objekte i predmete iz stava 1. ovog člana održava vlasnik, odnosno korisnik objekta odnosno predmeta.

Član 101.

Kad su javne površine izgrađene i uređene kao stajališta javnog autobusnog saobraćaja na njima se postavljaju nadstrešnice za zaštitu ljudi, korpice za smeće, klupe i informacione table sa oznakom stajališta i ostalim informacijama vezanim za javni saobraćaj i slično.

O postavljanju i održavanju nadstrešnica brine preduzeće kome to općina Zavidovići povjeri.

Postavljanje i održavanje nadstrešnica na kojima postoji uređaj za reklamiranje, općina može povjeriti pravnom ili fizičkom licu koje je registrovano za tu djelatnost pod uslovima propisanim članom 24. ove Odluke.

Stajališta javnog autobusnog saobraćaja i stajališta taksi prevoza moraju se održavati u urdnom i ispravnom stanju, a svako oštećenje mora se otkloniti u roku od deset dana. Stajališta održava JKP «Radnik» Zavidovići ili druga ovlaštena fizička i pravna lice ukoliko im općina povjeri održavanje.

Stajališta taksi prevoza održava i uređuje Udruženja taksista u skladu sa uslovima utvrđenim ugovorom o korištenju javnih površina.

Član 102

Javna parkirališta moraju biti stalno održavana.

O uređenju i održavanju javnih parkirališta brine se preduzeće odnosno pravno ili fizičko lice kome je općina povjerila poslove naplate, uređenja i održavanja javnih parkirališta. Način i režim održavanja kamionskih terminala i javnih parkirališta, način povjeravanja naplate i održavanja kamionskih terminala i javnih parkirališta uredit će se aktom Općinskog načelnika.

2. Izgradnja i održavanje nužnika

Član 103

Svako domaćinstvo mora imati izgrađen higijenski nužnik u građevinskoj cjelini.

Higijenski nužnik mora biti priključen na vodovod i kanalizaciju a gdje to uslovi ne dozvoljavaju mora biti priključen na propisno izgrađenu dvokomornu septičku jamu bez izpuštanja fekalija.

Vanjski nužnici moraju biti priključeni na kanalizacija ili dvokomornu septičku jamu bez izlivanja i imati izgrađenu kućicu od čvrstog materijala..

Član 104.

Svaki objekat javnog značaja mora imati higijenski nužnik sa odvojenim kabinama sa predprostorom za muške i ženske osobe, izgrađen po odredbama iz predhodnog člana.

- 167 -

Član 105.

Javni nužnici se lociraju u skladu sa urbanističkim planom.

O izgradnji i rekonstrukciji javnih nužnika stara se preduzeće zaduženo za održavanje javnih površina.

Javni nužnici moraju biti izgrađeni po higijenskim zahtjevima sa dovoljnim brojem kabina i prostorom za pisoar sa posebnim ulazom za muškarce i žene.

Ovi nužnici moraju biti opremljeni najnužnijom opremom koja zadovoljava njihovu namjenu, a moraju biti otvoreni od 5 do 23 sata.

Član 106

O održavanju i upotrebi javnih nužnika stara se zaduženo preduzeće koje je ujedno i ovlašteno da utvrdi visinu naknade za korištenje nužnika.

Održavanje javnih nužnika može se povjeriti i određenim građanima pod uslovima utvrđenim ugovorom.

Član 107

Na građevinskim i drugim radilištima obavezno se grade nužnici sa zatvorenim nužničkom kućicom i nužničkom jamom.

Nužničku jamu iz predhodnog stava treba zatrti sa zemljom čim se napuni do dvije trećine, a okolinu dezinficirati klorom, a potom iskopati novu jamu ili postojeću očistiti na higijenski način.

3. Pijace

Član 108.

Pijaca poljoprivrednih proizvoda, rabljene robe, žive stoke i drugih proizvoda, (u daljem tekstu pijaca) treba biti smještena na mjestu koje je pristupačno potrošačima.

Pijaca mora biti ograđena a plato asfaltiran. Po završetku pijačnog reda, pijaca se mora isti dan temeljito očistiti i šmrkovima oprati, a smeće odvesti na za to određeno mjesto.

Član 109.

Prateći objekti: magacin, kancelarija, prostorija za vage, portirnica i drugi izgrađeni objekti u pijačnom krugu, moraju se održavati uvijek u čistom stanju. Na pijaci mora postojati česma sa dovoljnim brojem slavina sa tekućom pitkom vodom, hidrant za gašenje požara i pranje pijačnog prostora kao i higijenski javni nužnik sa određenim brojem kabina i pisoara, a u predprostoru lavabo i pribor za pranje ruku. Na kabinama nužnika moraju biti oznake ženski i muški WC.

Član 110.

Pijaca mora da ima slijedeće odjele:

- a.) odjel za prodaju mlijeka i mliječnih proizvoda i zaklane živine,
- b.) odjel za prodaju voća, povrća i cvijeća,
- c.) odjel za prodaju zanatskih i drugih proizvoda i kućne radinosti.

Na svim odjelima stolovi moraju biti betonski, a na odjelu za prodaju mlijeka i mliječnih proizvoda i zaklane živine, stolovi moraju biti nadkriveni i zatvoreni.

Na odjelu za prodaju mlijeka i mliječnih proizvoda prodavači moraju nositi bijele kecelje i podlaktice što se čuva u za to određenoj prostoriji u pijačnoj upravi.

- 168 -

Član 111

Lokacije otvorenih pijaca na području općine utvrđuje Općinsko vijeće na prijedlog Općinskog načelnika. Otvorene pijace na kojima se obavlja promet poljoprivrednih i drugih proizvoda, rabljene robe, kao i žive stoke moraju biti čiste i uredne, o čemu su brine pravno ili fizičko lice kome je povjereno organizovanje i održavanje pijaca.

Član 112

Na otvorenim pijacama postavljaju se odgovarajući kontejneri i korpice za otpadke i smeće.

Pravno ili fizičko lice kome je povjereno upravljanje i održavanje pijaca dužno je osiguravati ispravnost i čistoću opreme i uređaja na otvorenim pijacama.

Pijačni red donosi pravno ili fizičko lice koje upravlja i održava pijace uz saglasnost Službe za upravu ekonomskih poslova i poduzetništva.

Pijačni red u smislu predhodnog člana pravno ili fizičko lice koje upravlja i održava pijace dužno je donijeti na način propisan u predhodnom stavu u roku od 60 dana od dana stupanja na snagu ove Odluke.

Član 113

Zabranjeno je korištenje drugih javnih površina izvan prostora otvorenih pijaca u svrhu prodaje ili izlaganja poljoprivrednih, prehrambenih, tekstilnih, tehničkih i drugih proizvoda bez odobrenja Službe za upravu geodetskih i imovniško-pravnih poslova i urbanizma.

4. Održavanje komunalnih objekata

Član 114

O održavanju i uređenju komunalnih objekata od opšteg interesa kao što su: bazeni, plaže, izletišta i sl. Brine se nadležno preduzeće u skladu sa normama i propisima za održavanje takvih objekata.

Održavanje ostalih objekata koji su javnog karaktera vrše njihovi vlasnici ili korisnici.

Član 115.

Na površinama oko objekata iz predhodnog člana ne može se obavljati djelatnost niti vršiti drugi poslovi koji nisu u vezi sa djelatnošću odnosno sa namjenom odgovarajućih objekata. Na tim površinama, osim saobraćajnih znakova, postolja za svjetiljke i korpi za otpatke, mogu se postavljati samo predmeti koje traži imalac ili korisnik odgovarajućeg objekta uz saglasnost organa nadležnog za komunalne poslove.

5. Uređenje grada

Član 116.

Komunalni objekti, izlozi, reklamni panoi i sl. Objekti moraju se uvijek održavati u ispravnom stanju kako bi se time postigao lijep izgled grada.

Estetske i druge uslove za lijep izgled grada utvrđuje organ nadležan za poslove urbanizma.

Član 117.

Zabranjeno je prljanje zidova, fasada (lijepljenje oglasa, posmrtnica, obavještenja, ispisivanje parola), ogradna, vrata, oglasnih tabli natpisa, spomenika, klupa, korpica i sl. Inventara na javnim površinama u gradu. Na javnim česnama zabranjeno je pranje rublja i vozila.

Preduzeće koje održava javne površine obavezno je da obezbijedi mjesta na panoima za lijepljenje oglasa, posmrtnica, obavještenja i dr.

Na ulicama su zabranjene bilo kakve igre ako za to nema posebnog odobrenja organa uprave nadležnog za komunalne poslove.

Član 118.

Izlozi trgovinskih, zanatskih i drugih radnji i ostalih poslovnih prostorija u noćnim satima moraju biti osvijetljeni.

Izlozi se uređuju prema standardima koji važe u određenoj djelatnosti ili prema vrsti robe i drugim predmetima koji se prodaju ili postavljaju radi reklame.

Za vrijeme praznika ili drugih prigodnih svečanosti izlozi se moraju uređivati i dekorisati. Spoljni dijelovi izloga moraju se, prema potrebi, bojiti a stakleni dijelovi redovno prati.

Član 119.

O održavanju panoa i oglasnih tabli stara se preduzeće koje je zaduženo za održavanje javnih površina.

Naknadu za usluge isticanja objave, obavještenja i sl. uvrđuje organ nadležan za komunalne poslove.

Član 120.

Oznake firmi, preduzeća, ustanova, samostalnih privrednika postavljaju se prvenstveno od svjetlećih naprava, moraju biti uredno ispisane i redovno održavane.

Oznaka firme može sadržavati sve što predviđaju propisi o firmama.

Estetski oblik obilježja firme i reklamnih panoa kao i mjesto postavljanja određuje organ nadležan za poslove urbanizma.

Član 121.

Nazivi ulica i trgova moraju biti vidno istaknuti na raskrscima, a ako raskrsnice nema ili su jedna od druge udaljene više od 500 metara, na svakih 200 metara u ulici tabla sa nazivom stavlja se na zgradu objekta.

Odobrenje za postavljanje natpisa i reklama kao i njihove dimenzije i mjesto određuje organ nadležan za poslove urbanizma.

Nabavku i postavljanje tabli sa nazivima ulica i trgova vrši preduzeće kome su povjereni poslovi održavanja javnih gradskih površina.

Član 122.

Posmrtni plakati i oglasi mogu se isticati kod groblja, džamije, crkve i na zgradi ili prostoriji u kojoj je umrli stanovao ili radio, kao i na drugim oglasnim tablama, a zabranjuje se njihovo isticanje na drvećima i stubovima.

Drugi oglasi mogu se isticati na oglasnim tablama. Isticanje ovih oglasa na drugim mjestima zabranjeno je.

Član 123.

Izuzetno, preduzeća, ustanove i samostalni privrednici iz oblasti prometa, ugostiteljstva, zanastva i sl. mogu reklamirati sniženje cijena i kvaliteta robe i proizvoda i obavještenje o tome isticati u izlozima svojih prostorija, pri čemu su dužni voditi računa o estetskom izgledu objekta i oglasnog materijala.

Član 124.

Saobraćajni znaci čije je mjesto i vrsta određena propisima iz oblasti saobraćaja, moraju biti stalno u ispravnom stanju.

O održavanju saobraćajnih znakova stara se preduzeće kojemu su povjereni poslovi održavanja javnih površina.

Član 125.

Po trotoarima se može pisati i crtati radi reklame ili obilježavanja proslave značajnih datuma. Vrstu i veličinu slova, cifara i drugih znakova, vrstu boje, razmak između tekstova ili tačno mjesto teksta odnosno crteža određuje organ nadležan za poslove urbanizma.

Član 126.

Prelaz preko određenih javnih površina sa neizgrađenim stazama ili kolovozom i klesanje ivičnjaka radi prelaza masovnih vozila može se vršiti samo na mjestima koja odredi organ nadležan za urbanizam.

Član 127.

Zabranjeno je sankanje i klizanje djece u zimskom periodu na prometnim ulicama i na drugim javnim površinama.

Određene ulice i druge javne površine mogu se koristiti za sankanje i klizanje djece u zimskom periodu pod uslovima i na način određen organa nadležnog za komunalnu inspekciju.

6. Uređenje grada povodom praznika i drugih manifestacija

Član 128.

Povodom državnih praznika i drugih manifestacija od značaja za općinu ili grad, vrši se uređenje i dekoracija grada.

Član 129.

Pravna i fizička lica koji su korisnici ili vlasnici poslovnih prostorija, moraju imati zastavu BiH, propisima utvrđenog oblika, koja se obavezno postavlja povodom državnih praznika i ističe na za to određenom mjestu.

Član 130.

U roku od 24 sata po isteku državnog praznika ili drugog značajnog datuma utvrđenog ovom Odlukom, zastave se moraju skinuti.

Član 131.

Zabranjeno je isticanje nečiste, pogužvane, pocijepane ili protupropisno izrađene zastave.

U dane nacionalne ili opšte žalosti zastave se ističu na pola koplja.

Član 132.

Građani, preduzeća, ustanove, samostalni privrednici i kućni savjeti dužni su za vrijeme državnih i vjerskih praznika pojačati čistoću površina i prostorija koje im pripadaju, a nadležno preduzeće će izvršiti dekoraciju javnih površina i pojačati poslove uređenja, pranja i polijevanja ulica i drugih javnih površina u gradu.

V – KOMUNALNA HIGIJENA U SEOSKIM NASELJIMA

Član 133.

Korisnici i vlasnici zgrada van područja iz člana 6. ove Odluke sami uklanjaju smeće i druge otpadne materije tako što ga sakupljaju i zatrpavaju na đubrištima ili na podobnom mjestu u iskopane jame, koje se posipaju tankim slojem zemlje.

Zabranjeno je bacanje smeća i drugih otpadnih materija u korita rijeka i potoka i u blizini objekata za snadbijevanje vodom.

Zabranjeno je pranje vozila svih vrsta u vodotocima i na prostoru neposredno pored vodotoka rijeka Bosne, Krivaje i Gostovića.

Član 134.

Dvorišta oko stambenih i drugih objekata moraju se držati čisto i uredno.

Držanje krupne i sitne stoke neposredno oko stambenih objekata nije dozvoljeno. Torovi i štale za krupnu i sitnu stoku moraju biti udaljeni najmanje 20 metara od stambenih i vodnih objekata.

Član 135.

Štale i svinjci i ograđeni ispusti za stoku moraju biti izgrađeni na način dat u članu 71. i 72. ove Odluke. Zatvorena ili ograđena boravišta životinja moraju se držati u čistom stanju.

Po potrebi, a poslije čišćenja obavezno prostori iz stava 1 ovog člana moraju se dezinficirati.

Član 136.

Bunari i česme iz kojih se koristi voda za piće moraju imati zaštitnu zonu čiji je krug utvrđen posebnom Odlukom.

Otvoreni bunari moraju imati kućicu od tvrdog materijala ili daske. Teren oko bunara ili česme mora biti izgrađen od čvrstog materijala sa padom u suprotnom pravcu od objekta. Napajanje stoke i pranje raznih predmeta može se vršiti samo izvan zaštitne zone.

Član 137.

Svako domaćinstvo u selu mora imati izgrađen higijenski nužnik, na način propisan u članu 103. ove Odluke.

Član 138.

O održavanju i režimu korištenja javnih i spomen česmi kao i prirodnih izvora u javnoj upotrebi, staraju se mjesne zajednice u skladu sa odredbama ove Odluke.

Član 139.

Zakopavanje uginulih životinja može se vršiti na mjestima koja su dovoljno udaljena od stambenih i drugih gospodarskih objekata.

Zabranjeno je bacanje uginulih životinja u korita rijeka i potoka, u šume ili druge površine koje su u blizini naselja.

Psi se mogu držati u kućicama koje moraju biti udaljene od stambenih zgrada, ulica ili vodnih objekata najmanje 10 metara u prostoru zatvorenom od puta.

Kućice za pse moraju se držati u čistom stanju i povremeno dezinficirati.

Zabranjeno je puštanje pasa da se slobodno kreću.

Član 140.

U seoskim naseljima, mjesne zajednice i organ nadležan za poslove prostornog uređenja dužni su odrediti lokacije za javna smetlišta o kojima se stara i održava ih mjesna zajednica.

VI – NADZOR

Član 141.

Nadzor nad provođenjem odredaba ove Odluke obavlja Služba za upravu ekonomskih poslova i poduzetništva, komunalna, sanitarna i druge inspekcije, kao i komunalno ekološka kontrola općine.

Poslove komunalne inspekcije obavljaju komunalni inspektori, a poslove komunalno ekološke kontrole obavljaju komunalno-ekološki kontrolori. Komunalni inspektori i komunalno-ekološki kontrolor pri obavljanju poslova moraju imati posebnu odjeću, posebnu oznaku na odjeći i posebne službene iskaznice. Službene iskaznice komunalnim inspektorima i komunalno-ekološkim kontrolorima izdaje Općinski načelnik.

Općinski načelnik donosi Pravilnik o obliku, sadržaju i načinu izdavanja iskaznica, odjeće i oznaka na odjeći komunalnih inspektora i komunalno-ekoloških kontrolora.

Član 142.

U vršenju komunalnog nadzora komunalno ekološki kontrolor je dužan i ovlašten da:

- upozorava pravna i fizička lica na ponašanje u skladu sa ovom Odlukom i propisima donesenim na osnovu ove Odluke,
- obavještava komunalnog inspektora o slučajevima neizvršenja odredaba ove Odluke,
- pomaže komunalnom inspektor u obavljanju njegovih poslova i
- obavlja i druge poslove koji su im povjereni.

Član 143.

Komunalni inspektor i ekološki policajac u obavljanju svojih poslova dužni su se pridržavati zakona, ove Odluke i drugih propisa.

Komunalni inspektor i ekološki policajac obavljaju poslove nadzora u ime Općine, postupaju i donose akte u okviru dužnosti i ovlaštenja utvrđenih ovom Odlukom.

Član 144

Ako izvršilac prekršaja ne postupi po rješenju komunalnog inspektora, naređenu radnju (uklanjanje, čišćenje, popravak, zamjenu i slično) izvršit će komunalni inspektor putem drugog lica o trošku i na rizik izvršioca prekršaja.

Član 145

Pravna i fizička lica dužna su komunalnom inspektor i ekološkom policajcu omogućiti nesmetano obavljanje nadzora a posebno pristup do prostorija, objekata, zemljišta, uređaja i naprava zatim dati lične podatke kao i pružiti druga potrebna obavještenja.

Član 146

Ako komunalni inspektor i ekološki policajac u svom radu naiđe na otpor, zatražit će pomoć od nadležne policijske uprave i drugih nadležnih organa državne uprave.

Član 147

Protiv rješenja komunalnog inspektora može se izjaviti žalba u roku od 15 dana od dana dostavljanja rješenja. Žalba izjavljena protiv rješenja iz predhodnog stava podnosi se Drugostepenoj komisiji za rješavanje po žalbama izjavljenim protiv prvostepenih rješenja i drugih pojedinačnih akata Općinskog Načelnika.

Član 148.

U vršenju inspekcijskog nadzora komunalna inspekcija svoj rad objedinjava sa radom ostalih inspekcija, a naročito sa radom sanitarne inspekcije, kao i sa radom drugih organa uprave.

Komunalna inspekcija mora na terenu da obezbijedi stalno prisustvo i da pruži svoju pomoć preduzećima koja imaju javna ovlaštenja u komunalnoj oblasti.

Član 149.

Komunalna inspekcija preduzima hitne mjere za otklanjanje nedostataka na održavanju komunalne higijene i smetnji u radu komunalnih službi. U tom cilju komunalna inspekcija naročito:

1. kontroliše redovno održavanje komunalnih objekata i uređaja kao i način njihove upotrebe,
2. naređuje izvršenje obaveza imaoaca ili korisnika komunalnih objekata ili uređaja,
3. zabranjuje upotrebu neispravnog ili po život i zdravlje ljudi opasnog komunalnog objekta ili uređaja i povodom toga naređuje hitne mjere o načinu zadovoljenja komunalnih potreba,
4. naređuje uklanjanje materijala, robe i drugih predmeta namjenjih prometu i potrebama građana, smeća i otpadaka čije prisustvo na javnim površinama i objektima remeti komunalni red, kao i kioska, ograda i drugih objekata za čije postavljanje nije dato odobrenje po odredbama ove Odluke,
5. naređuje uređenje spoljnog izgleda zgrada, ulica i drugih javnih površina, firmi, reklama, radilišta, dvorišta neizgrađenih površina, stovarišta, reklamnih vitrina i stubova, ograda, kioska, spomenika, saobraćajnih znakova i površina koje su od uticaja na izgled i estetsko uređenje grada,
6. kontroliše održavanje čistoće na ulicama, trgovima, pijacama, parkovima, izletištim, grobljima, drugim otvorenim javnim površinama, stadionima i sportskim terenima,
7. kontroliše istovar, utovar i pretovar ogrijevnog, građevinskog i drugog materijala i robe, iznošenje kućnog i uličnog smeća, šljake i sl. i deponovanja robe i ambalaže na javnim površinama,
8. kontroliše vršenje komunalnih usluga, snadbijevanje vodom, gradsku čistoću,
9. kontroliše uređenje, održavanje i upotrebu ulica, trgova, riječnih obala, parkova i zelenih površina, groblja, javnih kupatila, javnih česmi, bunara i javnih klozeta,
10. kontroliše funkcionisanje i upotrebu javnih časovnika i drugih javnih automata,
11. naređuje uklanjanje snijega sa ulica, krovova, terasa i drugih javnih komunalnih objekata,
12. kontroliše držanje i kretanje životinja i životinja-kućnih ljubimaca,
13. preduzima mjere protiv lica koja drže, kreću se po javnim i drugim površinama i hrane tegleću stoku na mjestima na kojima je to zabranjeno,
14. određuje rokove za otklanjanje neispravnosti na komunalnim objektima i uređajima kao i za uklanjanje pojedinih predmeta i objekata ukoliko ovom Odlukom nije drugačije određeno,
15. obavlja i druge poslove predviđene ovom Odlukom te ukazuje pomoć drugima organima uprave ukoliko to bude potrebno

VII – KAZNE NE ODREDBE

Član 150.

Novčanom kaznom od 50,00 do 2.000,00 KM kaznit će se za prekršaj preduzeće kojemu je povjereno da čisti i održava javne gradske površine, drugo preduzeće, ustanova ili drugo pravno lice ako:

1. ne postupi u skladu sa odredbom člana 9 (član 9.)
2. postupi protivno odredbi člana 12 (član 12)
3. u parkovima i drugim zelenim površinama vrši kretanje ili parkiranje vozila i kampiranja u cilju odmora i prenoćišta (član 13),
4. na javnoj površini pere ili opravlja auto, ili obavlja drugu zanatsku djelatnost (Član 14),
5. ne izvrši sječu stabala u skladu sa članom 17 (član 17)
6. vrši prekopavanje zelenih javnih površina i ostalih javnih površina suprotno odredbama člana 18 i 21 (član 18 i 21)
7. ne poduzme sve potrebne mjere za održavanje čistoće na gradilištu i na javnim površinama oko gradilišta (član 22)
8. pri izvođenju radova na ulicama ili drugim javnim površinama ne obezbijedi da se prlja okolina gradilišta i ne izvrši čišćenje i pranje zaprljane površine po završetku radova (član 27)
9. ne postupi u skladu sa članom 32 i 33 (član 32 i 33)
10. ne očisti snijeg i led sa površina u opštoj upotrebi (član 36)
11. postupi suprotno odredbi člana 38 i 39 (član 38 i 39)
12. u kontejner za kućno smeće baca industrijske glomazne otpatke, nagrizajuće tečnosti otrovne materije, uginule životinje i dr. (član 50)
13. ne vrši blagovremeno i kvalitetno održavanje javne čistoće (član 53-56)
14. ne postupi po odredbi člana 57 i 58 (član 57 i 58)
15. licima na održavanju javne čistoće ne obezbijede odgovarajuću odjeću i obuću (član 60)
16. ne postupi po odredbama člana 64,65 i 66 (član 64,65 i 66)
17. ne organizuje akciju uništavanja pasa lualica (član 68)
18. drži stoku, pse i perad na javnim površinama, u objektima i šteta sa životinjama protivno članu 69. (član 69)
19. postupi protivno odredbama člana 71 (član 71).
20. podiže ograde oko stambenih objekata za koju nema odobrenje nadležnog organa (član 97)
21. izvrši postavljanje ograde oko industrijskih i drugih objekata bez posebne projektne dokumentacije usaglašene sa urbanističkim rješenjem (član 98)
22. postupi suprotno odredbama člana 100 i 101 (član 100 i 101)
23. ne održava čistoću na javnim parkiralištima (član 102)
24. po završetku rada pijace istu ne dovede u uredno stanje-očisti (član 108)
25. postupi suprotno odredbi člana 127 (član 127)
26. po trotoarima ispisuje reklame i druga obilježja (član 125)
27. ako ne postupi po izvršnom rješenju nadležne inspekcije (član 133 i 139.)

Za prekršaj iz predhodnog stava kaznit će se i odgovorno lice u pravnom licu novčanom kaznom od 50,00 do 800,00 KM.

Za prekršaj iz prvog stava ovog člana kaznit će se i samostalni privrednik, novčanom kaznom od 50,00 do 800,00 KM.

Za prekršaj iz prvog stava ovog člana kaznit će se građanin novčanom kaznom u iznosu od 10,00 do 200,00 KM.

Član 151.

Novčanom kaznom od 50,00 do 2.000,00 KM kaznit će se za prekršaj preduzeće, ustanova ili drugo pravno lice:

1. ako vrši rasipanje materijala,
2. ako na javnim površinama organizuje cirkusne priredbe, igre sa životinjama i sl. (član 15)
3. ako postupi protivno članu 23 (član 23)

4. ako se kreće vozilima na javnim gradskim površinama protivno odredbi člana 25 (član25)

SLUŽBENI GLASNIK OPĆINE ZAVIDOVIĆI broj 4/2004

- 175 -

5. ako drži stoku protivno odredbi člana 71 (član 71)
6. ako postavlja košnice sa pčelama protivno članu 73 (član 73)
7. ako na javnim površinama hrani i napasa stoku, (član 16.)

Za prekršaje iz predhodnog stava kaznit će se i odgovorno lice u preduzeću ili drugom pravnom licu novčanom kaznom od 500,00 do 800,00 KM.

Za prekršaje iz prvog stava ovog člana kaznit će se i samostalni privrednik novčanom kaznom u iznosu od 50,00 do 800,00 KM.

Za prekršaj iz predhodnog stava ovog člana kaznit će se građanin novčanom kaznom od 10,00 do 200,00 Km.

Član 152.

Novčanom kaznom od 10,00 do 200,00 KM kaznit će se za prekršaj građani:

1. ako na zelenim javnim površinama uzgaja voće, povrće i dr.(član 11)
2. ako na javnim površinama baca papire i druge otpadke, stvara nečistoću, (član 26.),
3. ulični prodavači postupe suprotno članu 30 (član 30)
4. vrši prekopavanje, prebiranje i rasipanje smeća iz kontejnera (član 51)
5. ako oštećuje zelenilo u parku, klupe, fontane, spomenike i slično, (član 80. i 81.),
6. ispušta fekalije i otpadne vode na poljoprivredna zemljišta (član 61)

VIII– ZAVRŠNE ODREDBE

Član 153.

Stupanjem na snagu ove Odluke prestaje da važi Odluka o komunalnom redu i sanitarnom minimumu ("Službeni glasnik općine Zavidovići", broj 3/00, 6/00, 9/00. i 7/02.).

Član 154.

Ova Odluka stupa na snagu prvog narednog dana od dana objavljivanja u Službenom glasniku općine Zavidovići.

OPĆINA ZAVIDOVIĆI
OPĆINSKO VIJEĆE

PREDSJEDAVAJUĆI
OPĆINSKOG VIJEĆA

Broj: 01-02-4273
Dana, 15.04.2004.godine

(M.P.)

Fuad Berberović, s.r.

